



We will be conducting system maintenance from Thursday 9 February 2023, 11pm to Friday 10 February 2023, 12am. Patrons may experience intermittent connectivity to NLB websites during this period. Thank you for your understanding.

Kagum dengan usaha Persisi mendidik anggota

BERITA HARIAN, 22 October 2006, Page 16

Article also available on Microfilm Reel NL27063

Printer-Friendly Page

Kagum dengan usaha Persisi mendidik anggota

CAKAP SINI YUSOFF A. RAHMAN

DIAM tak diam, kita sudah hampir sampai ke akhir Ramadan. Selasa ini, kita akan menyambut Hari Raya.

Bercakap tentang Ramadan, saya kagum dengan usaha Persekutuan Silat Singapura (Persisi) sejak beberapa tahun lalu mengadakan majlis iftar, solat Maghrib, Isyak dan kemudian tarawih untuk para pesilatnya sepanjang bulan mulia ini di Pusat Kecemerlangan Bedok.

Selain berlatih, mereka turut beribadah. Dunia dapat, akhirat juga dapat. Dan yang tidak kurang pentingnya, menambahkan kemesraan di kalangan pesilat, jurulatih dan pegawai.

Tetapi yang lebih menarik lagi Persisi kini mempunyai seorang ustaz di kalangan jurulatih nasionalnya.

Peranan Ustaz Mohamad Bahrul-Ulum Haji Buang bukan sekadar menjadi jurulatih malah juga menjadi pembimbing dalam soal agama kepada pesilat-pesilat muda.

Hari ini, tanyalah jurulatih bola sepak seperti Tohari Pajjan, yang melatih bola sepak di kalangan pelajar-pelajar sekolah, soal akhlak mereka begitu membimbangkan. Ini barangkali ada kaitan dengan kurang didikan agama.

Akibatnya, macam-macam boleh berlaku. Kalau soal bercakap kasar, memaki hamun, terjerit sana terjerit sini sudah menjadi perkara lumrah.

Ada ketikanya, kita yang melihat gelagat mereka yang berasa malu. Dan mereka pula seperti tidak berasa bersalah.

Harus diakui di kalangan ibu bapa, tidak semua yang benar-benar mengambil berat tentang akhlak anak masing-masing di luar rumah.

Ada yang menyerahkan tugas mendidik anak mereka itu kepada guru-guru sekolah. Tidak kurang kepada jurulatih-jurulatih.

Tetapi masalahnya, di kalangan jurulatih, tidak semua yang bersedia menjadi pembimbing. Barangkali membebankan. Mereka membataskan tugas kepada aspek latihan saja. Tidak lebih daripada itu. Ada yang berpendapat soal akhlak bukan urusan mereka. Itu tanggungjawab ibu bapa.

Bercakap tentang Ustaz Bahrul-Ulum, usahanya untuk membimbing para pesilat muda dalam soal keagamaan wajar diberikan sokongan termasuk daripada kalangan keluarga pesilat itu sendiri.

Sekurang-kurangnya ada pihak yang mengambil berat tentang soal kerohanian pesilat-pesilat ini.

Sebab sukan seperti silat dan bina badan adalah sukan individu. Ia adalah sukan yang diminati oleh orang-orang Melayu.

Ia juga sukan yang menjadi lambang keperkasaan. Cakap kasar, simbol kejantanan. Tetapi silap hari, mereka yang bergelar juara boleh besar kepala. Mula menunjukkan taringnya. Mula menimbulkan masalah disiplin. Dan mula menuntut ini dan menuntut itu.

Kita ingin melihat atlet Melayu bukan saja berjaya dalam cabang sukan masing-masing malah juga berakhlak baik.

Memang bukan mudah untuk mencapai matlamat serentak. Tetapi ia harus diusahakan seperti yang dilakukan oleh Persisi.

Kita tidak mahu melahirkan atlet yang angkuh. Sombong. Dan mudah lupa dajaran.

Sempai hari ini, kita sukar berjumpa ahli sukan seperti Johan Squash, Zainal Abidin Abdul Malek. Sentiasa peramah. Selalu saja tersenyum.

Sedang Persisi terus mengadakan majlis iftar sepanjang Ramadan, bila kah pula jirannya yang sebumbung, Perses melakukan usaha serupa itu.

Lebih bagus lagi, kalau dapat mengadakan secara bersama.

Apa kata mulai tahun depan?

